

Musica di compositor Jacobo Federico (Toty) Arends

Den Concierto Weveriana

ORANJESTAD - Federico Arends, conoci como Toty, a nace na Aruba dia 30 di december 1927, como yiu di Jacobo Federico Arends y Ana Wilhelmina Wever. Prueba di su talento musical ta e hecho cu e ta pianista, areglista y director musical autodidacto. Ademá Toty tabata docente di guitarra, cuarta, baho, mandolin, piano y di percusion. Entre otro el a duna les na De Trupialen y na Academia di Harpa y Cuarta di señor Edgard Kelkboom. E tabata director musical

di e conhunto Los Duques cu a toca pa Reina Juliana y Prins Bernard na 1955. E conhunto aki a toca tambe na apertura di "Aruba Caribbean Hotel" na 1959. Toty a dirigi e orkestra Estrella Musical cu tabatin Betico Croes q.e.p.d.como integrante.

Frère Alexius q.e.p.d. y Hubert "Lio" Booï a haci un trabou admirabel di rescate di cantica na Papiamentu y Toty a yuda nan skirbi e musica. E esfuerço aki a keda completa den e buki

di cantica "Nos ta canta" cu te dia di awe e maestro nan di scol ta uza pa siña e muchanan canta.

Conserva y rescata nos cultura musical y pas'e pa su pueblo, ta Toty su encargo di bida. El a yuda entre otro cu publicacion di e bukinan didactico Lora un Wals di Eddy Bennet q.e.p.d. y Historia y Metodo di Cuarta di Doodle Sophia.

Pa promove nos musica mas ainda el a publica e proyecto "Toca y Dorna un Wals", cu ta consisti di un manual didactico

cu instruccion, un buki cu 15 di su composicionnan pa piano y un CD cu e 15 composicionnan aki. Toty ta skirbi den introduccion di e manual didactico:

"E metodo aki ta diseña pa splica den un forma simpel y practico, no unicamente con ta toca un wals riba piano den un forma avansa cu ta virtuosonan so por, sino tambe pa principiante, sin importa nan edad, ni tamaño di nan mannan. Ademá di (siña bo) toca un wals na nivel basico te avansa, e metodo ta mus-

tra e structura basico di nos walsnan cu por ser aplica sin importa nivel di e alumno. Un intento BASICO ta ser haci den e metodo aki pa mostra y duna ehempel con pa dorna, varia y improvisa un wals, tanto ritmico como melodicamente." Toty a percura pa tur su composicionnan, mas cu shen, ta documenta y accesibel pa tur musico y dia 15 di april den Concierto Weveriana diferente di Toty su composicionnan lo keda presenta pa nos musiconan. □

Oswald Wever, otro compositor Arubiano den Concierto Weveriana

ORANJESTAD - Oswald Raymond Wever a nace dia 7 di october 1939 na Aruba, como e prome di e 6 yiunan di Casper Wever y Maria Luisa Croes. Na edad di 11 aña su mayornan a regla les di fio p'e cerca Isaac da Costa Gomez (q.e.p.d.). Oswald a namora mes ora di e instrumento aki y pronto el a bira un di e miho alumnonan. Na edad di 13 aña el a bay Hulanda pa atende gymnasium di "St. Canisius College" na Nijmegen. Den e periodo ey Oswald a sigui tuma les di fio cerca Herman Hiddink (q.e.p.d.) y el a drenta den e Orkesta di Scol. Na edad di 15 aña el a bira concertmeester di e

orkesta y a toca varios biha como solista. Na edad di 17 aña, hunto cu algun otro estudiante, el a lanta un conhunto bou di e nomber The Tropical Serenaders, cu tabata toca musica Latino Americano, Arubiano y Antiano. E grupo a existi pa 10 aña na Nijmegen.

Despues cu Oswald a caba gymnasium, el a studia medicina na Universidad di Nijmegen (di 1958-1968). Den e temporada ey el a topa su casa Mieke Merks; nan a casa na 1964. Nan a haya 5 yiu: Wicha, Capi, Anita, Celina y Carina.

Su carera medico tabata exitoso: prome el a traha como dokter di cas na

Aruba y despues cu el a specialisa den "Interne Geneeskunde" na Groningen y a promove cu su disertacion "Alcoholism in Aruba", el a traha como internista y tabata activo riba tereno di adiccion. E tabata docente y despues Adjunct Professor of Medicine na Ross University School of Medicine (Aruba). Pa tur su trabou el a recibí e titulo "Officier in de Orde van Oranje-Nassau" na 1993. Despues di su pensioen na 2008 Oswald a sigui traha como Professor of Internal Medicine na Au-

sum School of Medicine na Aruba y e ta participa den un investigacion científico riba tereno medico y arkeologico, hunto cu Museo Arqueologico y experto di Venezuela y Puerto Rico.

Nunca Oswald no a perde su amor pa musica. Banda di su actividadnan como violinista el a compone varios piesa, 19 den total. Na edad di 17 aña el a compone su prome wals Maria Luisa, dedica na su mama. Despues a sigui mas obra, entre otro e walsnan Pla-

yera y La Gotica. Diferente artista local y internacional a toca of canta obra di Oswald Wever, entre otro Edwin Abbath, Victor Camacho, Livio Hermans, Ron Speyer, Floor Huygen, Las Originales, Simon Gollo y Abraham Abreu. Fuente di inspiracion pa su composicionnan ta su esposa stima, su mayornan, su yiunan y su nietonan.

Y dia 15 di april den Concierto Weveriana diferente di e composicionnan di Oswald lo resona den Cas di Cultura. □

Pluchino su prome ADRL win cu sabor Arubiano!

ORANJESTAD - John Pluchino y Pluchi Racing no tabata di participa na e prome careda di American Drag Racing League (ADRL) na Royal Purple Raceway, Texas dianan 29 y 30 di Maart ultimo. Awor esaki a bira e weekend cu nunca mas e lo lubida. Cu ayudo di Team Aruba y un yiu cu a keda bise cu nan mester bay. John Pluchino biba na New York a dicide di subi un avion bek despues 25 aña sin buta un pia riba esakinan pa asina sali pa e prome careda di ADRL, Carsafe Dragpalooza VIII na Royal Purple Raceway den Houston. E storia ta bira aun mas miho ora cu John Pluchino ta logra su prome ADRL event ganando Brian Gahm den final di

Extreme Pro Stock. 25 aña pasa John a dicide di no bula mas den avion despues di a experencia un vuelo unda cu a haya problema cu landing gear. "Esaki ta manera un spookje," Pluchino a cuminsa ta bisa, "E sentimentonan cu mi tin awor ta algo cu mi no por describi. Pa core cu hendenan manera Den Goforth, Brian Gahm, Pete Berner, John Montecalvo y tur e otro coredonan den nos categoria di Extreme Pro Stock ya caba ta un honor y pa awor gana nan tur tambe ta algo increibel. Ora ma pasa finish line mi no por a kere esaki ta pasando." John Pluchino no por a keda expresa su gratitud pa cu Team Aruba. "Team

Aruba tabata sa cu nos no tin e tempo pa perde asina hopi dia di trabou pa bay Texas bin bek New York. Esaki a haci cu Team Aruba a ofrece nos pa transporta nos Ford Escort Extreme Pro Stock pa Texas y cu nos por haci uzo di tur nan facilidadnan," Pluchino a sigui, "Sin e hende nan aki nos lo no por tabata aki, mi kier gradici Trevor y su crew completo cu a habri nan portanan pa nos. E hende nan aki di Aruba ta un clase aparte!" "E weekend aki tabata uno di mira y siña pa e otro careda pero tambe purba di loke ta pa gana un evento asina," Trevor Eman a comenta, "Pa nos e tabata un careda cu nos kier lubida lihe, pero mi ta hopi contento pa John." □

FRASA INTERNATIONAL TRADING N.V.

Tin Vacatura

**Dos (2) LOGISTIEK MEDEWERKER
CU CONECAMENTO DI E TRABAJO AKI.
Gutenbergstraat #2, Oranjestad
Tel.: 582-2704 Fax: 582-3187**

Prome cu solicita of yama mester registra na
DPL Seroe Blanco #4 cu un cedula of papel di
Afl. 5,= di Registro Civil.

Entre 7:30 - 11:00 mainta di Dialuna pa Diabierna